



Մ
ՆԵՐՍԵՍ
ՈՎԿԵՒ



ԲԱՆԱԿ
ԻՏԵՂՅՈՒ
ԹՅՈՒՆՆԵՐ



ՆԵՐՍԵՍ ՄՈԿԱՑԻ

16-րդ դարի վերջի և 17-րդ դարի առաջին քառորդի նշանավոր գործիչ Ներսես Մոկացին ծնվել է պատմական Հայաստանի Մոկք գավառի Ասկնջալս գյուղում (ունեցել է նաև Վանեցի և Բեղլու անվանումները): Ստանալով խոր և հարուստ գիտելիքներ, Ներսես Մոկացին նվիրվում է վանական միաբանություններում ծավալվող կրթա-լուսավորչական աշխատանքի: Նա երկար ժամանակ աշխատում է որպես մանկավարժ, հիմնում է անապատական միաբանություն: Այս առումով նրա կյանքը կապված է եղել հատկապես Բաղեշի Ամրդղու վանքի, Սյունյաց Մեծ անապատի և Լիմ կղզու միաբանության հետ: Եղել է Լիմի միաբանության հիմնադիր առաջնորդը, այնտեղ էլ կնքել է մահկանացուն:

Ներսես Մոկացու դիմապատկերի կարևոր ու բնորոշ գիծը նաև այն է, որ եղել է իր ժամանակի փիլիսոփայական մտքի նշանավոր ներկայացուցիչը: 5-րդ դարում սկսված ու արմատական հիմքերի վրա դրված ինքնուրույն-ազգային փիլիսոփայական երկերի հարուստ ավանդները հետագա դարերում հետևողականորեն ու բազմակողմանիորեն զարգացան, հարստանալով թարգմանական ու ազգային նոր արժեքներով: Սակայն 17-րդ դարի սկզբին, քաղաքական

անբարեկապատ պայմանների հետևանքով, այդ առաջ-
 ընթացք մի կարճ ժամանակով ընդհատվեց: Փիլիսոփա-
 յական մտքի ավանդների յուրացման կարևորագույն գործը
 իր ձեռքը վերցրեց Բաղեշի Ամրդոլու դպրոցի հիմնադիր
 Բարսեղ Գավառացին, որը վերականգնեց հայոց դպրու-
 թյան հնամենի ավանդները, պատրաստեց բազմաթիվ
 աշակերտներ, որոնցից Ներսես Մոկացին փիլիսոփայու-
 թյան իմացությամբ գերազանցեց իր ուսուցչին և ընկերնե-
 րին¹: Ուշագրավ է, որ Բաղեշի դպրոցը Լեոն անվանում է
 «հայ ժողովրդի կուլտուրական հանճարի մի շատ թանկագին
 հուշարձան»²: Ինչպես Բարսեղ Գավառացու, այնպես էլ
 Ներսես Մոկացու համար առաջնակարգ խնդիր էր աշա-
 կերտներին լրիվ հասանելի դարձնել հայ փիլիսոփաների,
 ինչպես նաև Արիստոտելի, Պլատոնի, Պորփյուրի, Փիլոն
 Ալեքսանդրացու և մյուս մեծերի աշխատությունները:

16—17-րդ դարերում հայ գրականությունը զարգանում
 էր հիմնականում երկու ուղղությամբ՝ մեկն աչքի էր ընկ-
 նում հին ավանդների հետևողական պահպանումով, իսկ
 մյուսը՝ գրական նոր թեմաների ու նոր ձևերի որոնումով:
 Ներսես Մոկացին պատկանում էր առաջին ուղղությանը:
 Նրա ստեղծագործության մեջ արտացոլված էին ժամանակի
 համար առաջնակարգ նշանակություն ունեցող խնդիրներ՝
 հայրենիք, եկեղեցի, լուսավորություն: Նրա ստեղծագոր-
 ծությունների ներքին ազդակը հայ ժողովրդի ծանր վիճակն
 էր: Հայաստանն ավերվում էր թուրքերի և պարսիկների
 միջև ծագած կործանարար պատերազմներից, նրանց մշա-

¹ Առաքել Դավրիժեցի, Պատմութիւն, Վաղարշապատ, 1896, էջ 394:

² Լեո, Երկեր, Գ, Երևան, 1969, էջ 270:

Կաճ պետական ու քաղաքական միջոցառումներից: Պատմական հիշատակարանները ու մատենագրական աղբյուրները զարհուրանքով են նկարագրում վրա հասնող այդ արհավիրքները, հատկապես Շահ-Աբասի ձեռնարկած զանգվածային տեղահանումներն ու բռնի արտագաղթը Արևելյան Հայաստանում: Ներսես Մոկացու բանաստեղծություններն այդ իրականության անմիջական արտահայտություններն են:

Նրա պատմական բովանդակություն ունեցող ստեղծագործություններն են՝ «Օրհնեա՛լ տէր Յիսուս փրկիչ», «Ի հողովել ժամանակին», «Հատդ անմահական», «Եկալք նորագուարն մանկունք եկեղեցոյ»: Սրանց մեջ պատմական առումով արժեքավորը «Օրհնեա՛լ տէր Յիսուս փրկիչ» տողով սկսվող ներբողն է՝ նվիրված Սյունյաց Մեծ անապատի հիմնադրմանն ու նրա հիմնադիրներին:

Պատմական սկզբնաղբյուրներից հայտնի է, որ այս կարևոր միաբանության հիմնադրման գործում բացառիկ դեր խաղացին Սարգիս Ամբերդցին և Կիրակոս Տրապիզոնցին, ինչպես նաև Պողոս Մոկացի վարդապետը, որոնք Մելիք Հայկազնի օգնությամբ 17-րդ դարի սկզբին, Տաթևի մոտ, հիմնեցին Սյունյաց Մեծ անապատը: Ահա այս չորս նշանավոր անձանց և հայ կյանքի համար այնքան նշանակալից մի երևույթի է նվիրել Ներսես Մոկացին իր վերոհիշյալ ներբողը: Լեռն, բարձր գնահատելով այս ներբողը, նկատում է. «Հեղինակը երևան է հանում խոր ծանոթություն հայոց հին գրականության հետ և առհասարակ մի լավատեղյակ ու զարգացած մարդու տպավորություն է թողնում: Նրա համառոտ աշխատության մեջ կան պատմական արժեքավոր նյութեր ևս, որոնք զանցառության են մատնը-

ված ուրիշ ժամանակագիրների կողմից»¹: Իսկ Ղևոնդ Ալիշանը գտնում է, որ այս ներբողը գրված է «լավագույն տաղաչափությամբ և արժանի է գովության»²:

«Օրհնե՛ալ տէր Յիսուս փրկիչ» ներբողն սկսվում է քացառիկ ուրախ տրամադրությամբ և հպարտությամբ: Այստեղ ակնարկված պանծալի անուններից առաջինը վերոհիշյալ Մելիք Հայկազն է՝ մի քաջարի զորական, որն օսմանցիների դեմ մղած բազմաթիվ ճակատամարտերից հաղթանակով դուրս գալու համար ստացել էր հայրենի գավառի՝ Սյունիքի իշխանությունը: Իր այս իշխանությունն էլ հայրենասեր իշխանը օգտագործել էր անապատի հիմնադիրներին օգնություն ցույց տալու ժամանակ: Մելիք Հայկազնը ժողովրդի ազատագրման համար պայքարի ելած մարդու կերպար է՝ նման մեր միջնադարյան գրականության մեջ կերտված հայրենասեր իրական-պատմական հերոսներին: Այս ներբողը 17-րդ դարի կրթական կյանքի վերանորոգման առաջին արտահայտությունն է:

Ներսես Մոկացու պատմական թեմայով գրված ստեղծագործություններից մեկն է Անդրեաս քահանային նվիրված գանձը: Անդրեաս քահանան նահատակվել է 1617-ի նոյեմբերի 18-ին: Գանձը գրվել է դեպքի թարմ ազդեցության տակ: Նրանում կարճ և անպանույն տողերով ներկայացվում են Անդրեաս քահանայի երիտասարդ կյանքի պատմությունը և նահատակության մանրամասները: Գանձում Անդրեասը հանդես է գալիս որպես հերոսական կերպար, որն իր մահով փրկում է շատերի կյանքը: Նրա նահատա-

1 Լեո, Երկեր, Գ, Երևան, 1969, էջ 362:

2 Ղ. Ալիշան, Հայապատում, Վեներտիկ, 1901, էջ 618:

կությանը Առաքել Դավրիժեցին նվիրել է իր պատմության գլուխներից մեկը, որը և հիմք է դարձել Մուրացանի «Անդրեաս երեց» վիպակի համար: Ներսես Մոկացին Անդրեաս քահանայի հերոսությունը գեղարվեստորեն վերարտադրող առաջին հեղինակն է:

Գանձերին հատուկ կանոնների համաձայն այն ավարտվում է համապատասխան տաղով. «Եկայք նորագուարճ մանկունք եկեղեցոյ» սկզբնատողով: Թե՛ գանձը և թե՛ տաղը խազավորված են, որը վկայում է Ներսես Մոկացու երաժշտական գիտելիքների մասին:

Անցյալի թեմաներով գրված պատմական բնույթի ստեղծագործությունների մեջ ուրույն տեղ ունի «Ի հոլովել ժամանակին» տողով սկսվող ողբը՝ նվիրված Սալահադդինի կողմից 1187 թ. Երուսաղեմը գրավելու պատմությանը: «Ողբ վասն առմանն Երուսաղեմի» ստեղծագործությունը Ներսես Մոկացին գրել է իր եղբայրակիցների խնդրանքով: Այս ստեղծագործությունը ծայրեծայր ողբասացություն չէ, նրանում կան լուսավոր տրամադրությամբ գրված և ուրախ ուրախ ունեցող հատվածներ.

Տօն ցնծութեան կատարէին,
Զսուգն հին փարատէին.
Եւ յետ աուրց ինչ հանգստին
Վառեալ ի մարտ ընդ քաղաքին...

Այսպիսի մասերը կապվում են խաչակրաց երրորդ արշավանքի և խաչակիրների հաջողությունների հետ: Բանաստեղծը իր հայրենիքի ազատագրման գաղափարը կապում է խաչակիրների հետ, հստակ չպատկերացնելով նրանցից սպասվող ազատության հնարավորությունը. նրա

սպասելիքները չունեն այն պայծառությունը, ինչ տեսնում ենք Ներսես Շնորհալու «Ողբ Եդեսիոյ» պոեմում: Խաչակիրներից ակնկալվող փրկության գաղափարն ավելի շուտ ավանդական սովորություն էր, քան՝ իրական հնարավորություն:

Միջին դարերում, ինչպես նաև դրանից շատ առաջ, ընդհանուր մտածողության և ժողովրդական պատկերացումների մեջ իշխում էին «հոգու և մարմնի», «երկնքի և երկրի», «մարդու և բնության» փոխհարաբերության խընդիրները: Միջնադարն այդ խնդիրները դիտեց քրիստոնեության հիմնական գաղափարախոսության դիրքերից: Այդ մտածողությունը բազմապիսի արտացոլումներ գտավ ինչպես փիլիսոփայության, աստվածաբանության, այնպես էլ գեղարվեստական գրականության մեջ:

Հոգու և մարմնի փոխհարաբերության պատկերումը գեղարվեստական վերարտադրության նյութ է դարձել համարյա բոլոր ժողովուրդների մոտ: Մեր միջնադարյան ամբողջ գրականության միջով հետևողականորեն անցավ այդ գաղափարը՝ Մեսրոպ Մաշտոցից մինչև Սալյաթ-Նովա: Արդեն 10-րդ դարում, շնորհիվ Գրիգոր Նարեկացու, հոգու և մարմնի խնդիրը հասնում է կատարելության, դրսևորվում է այնպիսի լայնությամբ, խորությամբ և արվեստով, որպիսին չի տվել ժամանակի միջազգային գրականությունը:

Հոգու և մարմնի խնդիրները գրականության մեջ երբեմն հանդես են գալիս որպես վիճաբանություն երկու հակոտնյա կողմերի միջև: Այդօրինակ գործերից է Ներսես Մոկացու «Վիճաբանութիւն երկնի և երկրի» բանաստեղծությունը, ուր դրսևորված է այն համարձակ միտքը, թե աստ-

ված չի կարող պահպանել երկնքի ու երկրի հավերժությունը, եթե չլինի երկիրը:

Հեղինակի եզրահանգումն իսկ բավական է, որ բանաստեղծությունը դիտվի որպես իր ժամանակի առաջավոր մտքի ցայտուն արտացոլում: Այս բանաստեղծությունը հոգու և մարմնի փոխհարաբերությունը դրսևորող լավագույն ստեղծագործություններից է, որի դիպուկ բնութագիրը տվել է Մ. Աբեղյանը: Վերջինս միջնադարի հայ քնարերգության աշխարհականացումը դիտում է լինելիության պրոցեսում, որի ավարտուն արտահայտություններից մեկը համարում է Ներսես Մոկացու «Վիճաբանութիւն երկնի և երկրի» տաղը: Սրանով մեր քնարերգությունն արդեն կատարելապես իջնում է իրական աշխարհ. «Դա վերջն էր եկեղեցական-կրոնական ոգու և հայացքի»¹: Իրոք, այս տաղը որոշակիորեն բնորոշում է այն էտապը, երբ միջնադարյան հայ քնարերգությունն իր մեջ լայն չափերով ներծծել էր հայ ժողովրդական բանահյուսության կենսահաստատ էությունը և դարձել իրական կյանքի ճշգրիտ, գեղարվեստորեն հուզիչ ու համոզիչ վերարտադրությունը:

Հոգու և մարմնի երևակայված պայքարը հիմք հանդիսացավ նաև քնարական զանազան զղջումների, մեղայական աղերսանքների, որոնք աստիճանաբար վերանեցին գրական մի ամբողջ ուղղության: Ներսես Մոկացու «Մանուկ մտավարժ էի» ողբը պատկանում է ահա այդ ստեղծագործությունների շարքին: Ողբի մեջ բանաստեղծը քննադատում է հասարակական գլխավոր չարիքները՝ արծաթասի-

¹ Մ. Աբեղյան, Հայոց հին գրականության պատմություն, Բ, Երևան, 1946, էջ 588:

րությունը, կաշառակերությունն ու հարստահարությունը: Նա խարազանող խոսք է ուղղում նաև իրավունքի և ուժի անարդար տիրապետության դեմ.

Ուրար և փիլոն արկեալ,
Թէ լծովս խոր խոնարհեցայ,
Եւ անեղագոչ սաստիւ
Ի փոքունց վերայ բարձրացայ...
Եւ սիրամարգի նման
Սիգալով փերկեթեցայ...

Հեղինակը տվել է ժամանակի սոցիալական շարիքների մերկացումն ու քննադատությունը՝ նկատի առնելով հատկապես հոգևորականների առօրյան: Եվ Ներսես Մոկացու հիմնական նպատակն էլ դա պիտի լիներ, որպեսզի կարողանար բարոյապես մաքուր միաբանություններ հիմնել ու աշակերտներ դաստիարակել: Ողբում մեկը մյուսին են հաջորդում տպավորիչ պատկերները, դիպուկ համեմատությունները, որոնց շնորհիվ միմյանց են հակադրվում կենցաղավարության բարոյական ու անբարոյական, խրախուսելի և մերժելի, ազնիվ ու խոցելի կողմերը՝ առաջինների դրվատմամբ և երկրորդների պախարակումով: Միաժամանակ ակնհայտ է, որ բանաստեղծը բացահայտում է մարդկային բնավորության թերությունները, ցանկանալով մարդուն տեսնել իր էությունը խաթարող արատներից մաքրված:

Ներսես Մոկացու ստեղծագործության մեջ իր ուրույն տեղն ունի «Աստուած և տէրն ամենայնի...» տողով սկսվող ընդարձակ բանաստեղծությունը, որը երկու հեղինակի գործ է՝ Ներսես Մոկացու և նրա աշակերտ Ստեփանոս Ծառախեցու: Լրացման մեջ էլ իշխում է շարադրանքի նույն լեզուն,

ոճը, տաղաչափությունը և ոգին: Այդ հավելումը կատարված է հեղինակի գիտությամբ: Ներբողում զգալի են ժողովրդական ավանդության շունչը և ազգային կյանքի որոշ կողմերի արտացոլքը: Ներբողում հատուկ տեղ է տրված նախաքրիստոնեական շրջանի պաշտամունքի նկարագրությանն ու կոապաշտության հալածանքին: Ներկայացվում են Անձևացյաց գավառի հոչակավոր Կանգուար և Ագոավաքար կոատները, որտեղ պաշտվելիս է եղել հատկապես հեթանոս հայության հոչակավոր աստվածուհին՝ Անահիտը, որին և փոխարինում է քրիստոնեական Աստվածամայրը: Ներբողը մեզ է հաղորդում ազգագրական նյութեր: Ուշագրավ են հատկապես աղվեսի դիցաբանական կապը Անահիտի հետ, ինչպես նաև «յուրուք ուլունսի» կայծակից և քուրայից ստացված լինելու մասին եղած վկայությունները:

Անահիտ աստվածուհու մասին մեզ հասած տեղեկությունները դեռևս թերի են: Անհրաժեշտ փաստերի բացը լրացնում է ժողովրդի հիշողությունը, որը պահպանել է Անահիտի պաշտամունքի հեռավոր արձագանքները՝ այդ արձագանքների դրսևորումներից տեսնում ենք և այս ներբողում:

Ներբողը յուրատեսակ գույք լինելով քրիստոնեության հաղթանակի, օտար բռնակալության պայմաններում, յուրովի նպաստում էր հայ ժողովրդի համախմբմանը ազգային դավանանքի և հայրենասիրական գաղափարների շուրջը:

Ներսես Մոկացու ստեղծագործություններում կարելի է հանդիպել հայտնի գրական երեք սեռերին՝ էպիկական, քնարական, դրամատիկական: Միջնադարյան գրական տեսակների առումով էլ Ներսես Մոկացու ստեղծագործությունները բազմազան են: Նա գրել է և՛ ներբող, և՛ ողբ, և՛

տաղ, և՛ գանձ, և՛ աղոթք, և՛ տրամախոսություն: Նա ներքողների բնագավառն է ներմուծել հայրենասիրության, դպրության, լուսավորության գաղափարների փառաբանումը, ընդլայնել է նաև գանձերի թեմատիկ սահմանները՝ նյութ դարձնելով ժողովրդից ելած հայրենասերների գործերը: Նա խորացրել է վիճաբանական կոչվող գրական տեսակի մշակման փորձը և տվել է ժողովրդական նյութի լավագույն մշակման օրինակ՝ ի դեմս երկնքի և երկրի վիճաբանության:

Ներսես Մոկացու լեզուն գրաբարն է, սակայն ժամանակի շունչը մղել է, որպեսզի նա խոսի համեմատաբար պարզ ու հասկանալի գրաբարով, տեղ-տեղ հասնելով խոսակցական լեզվի մակարդակին: Պատահական չէ, որ նրա ստեղծագործությունների լեզուն գրավել է «Նոր բառգիրք հայկազեան լեզուի» աշխատության հեղինակների ուշադրությունը:

Ներսես Մոկացին եղել է եռանդուն գործիչ և շնորհալի բանաստեղծ, որի հասարակական-քաղաքական դիրքորոշումը և գրական հավատամքը սերտորեն միահյուսվել են ի նպաստ այն ազնիվ նպատակի, որն ապահովում էր օտար լծի տակ հեծող հայ ժողովրդի գոյատևումն ու ապագան: